



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

27. Kalenderwoche – ab 5. Juli 2009

Kenn'se den?

Da dun sisch zwee alde Kumbls dreffn... nach viele Jahre, wose sisch nisch gesähn hamm... bledzlich un unerwarded... sowas kommd ja ibrischens gahr isch so seldn vor im Lähm. Isch hab ooch kizlisch een aldn Kumbl gedroffn... odor bessor gesachd dähr misch... vor dor Koofhalle... där had misch angegwardschd un had mir dann erzähld, dassor mid mir zusamm in de Schule gegang is. In de Schbordschule. Isch wollde dähm das offn erschdn Momend nisch gloom. Isch bin zwar off dor Schbordschule gewähsn, abor isch konnde misch an dähn, dähr misch da nach ibor virrzisch Jahre gedroffn hadde, nisch erinnorn. Un eischendlich hadde ischs ooch e bißl eilisch un wollde noch in de Koofhalle, was einkoofn. Abor dähr hadde misch nu erkannd un had misch ausgehorschd, ob isch misch noch an dähn erinnorn kann... un an die... an dann dähr, dähr schbädor in den Wesdn abgehaun is? An dähn sein Nam konnde sisch dähr abor ooch nisch erinnorn. Abor isch konnde misch erinnorn, dass da werglisch eenor gewähsn is, dähr in dähn Wesdn abgehaun is. Dähr is Eisgundsleefor gewähsn. Un weil mir uns nu beede sischor warn, dass da eenor gewähsn is, dähr abgehaun is, hab isch nu ooch gegloobd, dass mir werglisch damals vor ibor virrzisch Jahre in eenor Glasse gewähsn sin. Un jedzde, wo mir uns also sischor warn, dass mir beede uns von friehor hähr kenn dun, had dähr misch weidor ausgehorschd... wie ehm ooch dähr eene Kumbl dähn annern Kumbl in dähm Widz. Jaa... nach so viele Jahre... un dähr eene frachd nu also, wies dähm annorn gehn dud. Da sachd dähr, dasses ihm schleschd gehen däde – de Firma had grade bleide gemachd un nu issor arbeitslos.

Dähr alde Schulfreind, dähr misch gedroffn hadde, dähr is ibrischens ooch grade arbeitslos gewähsn. Dähr in dähm Widz jedzde also ooch. Un der annre frachd nu weidor – wies denne so brivad aussähn dud? Da sachd dähr, dasses schleschd aussähn däde – de Frau is ihm abgehaun un had das ganze Geld midgehn lassn. Von seinor Frau had mei aldor Schulfreind nischd erzähld.

Dähr in dähm Widz frachd nu weidor: Un abgesähn von dor Frau – wie isses da?

Da sachd dähr, dasses abgesähn von dor Frau ganz beschissn sein däde – sei Hund is von eim Audo iborfahrn wordn un das Haus is abgebrannnd. Da dud dähr alde Kumbl sei Beileid bekundn.

Mei aldor Schulfreind war bloß selbor ma mid eim Audo zusammgeschdoßn un had seidhähr e gabuddes Been. Das dad mir dann doch e bißl leid, obwohl isch misch nisch an dähn erinnorn konnde. Der Kumbl in dähm Widz hadde nu ooch schon rischsdisches Midleid mid dähm annorn, dähnor so viel Jahre nisch gesähn hadde, un frachd nu, obs denne in seim Lähm gahr nischd Bosediefes gähm däde? Da sachd dähr: Doch, gesdorn had misch de Bollizei angehaldn – Algeholddesd – dähr war sähr bosedief!

Mei Kumbl, dähr misch erkannd hadde, scheind in seim Lähm abor ooch nisch viel mähr Gligg gehabbd zu ham. Abor nach ibor virrzisch Jahre konnde isch da werglisch nischd machn.

Eduard Sachsenmeyer